



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*

*20 Janeiru 2014*

**Eis membru Milisia Besi Merah Putih (BMP) kontinua julga iha Tribunál Distritál Dili**

Iha 20 Janeiru 2014, Tribunál Distritál Dili kontinua julga kazu krime grave ne'ebé akontese iha 4 Setembru 1999, iha Distritu Liquiça. Kazu ne'e involve arguidu ho inisiál LV nu'udár membru milísia Besi Merah Putih (BMP) ne'ebé diskonfia involve iha kazu krime kontra umanidade ne'ebé akontese iha Distritu Liquiça.

“JSMP haksolok atu hare katak tribunál kontinua julga kazu krime kontra umanidade sira ne'ebé akontese iha pasadu hodi fo justisa ba vítima sira, aseguara akuntabilidade ba krime pasadu sira no preve akontesementu hanesan iha futuro. Tanba ne'e, JSMP ezije autór judiasiriu no parte sira hotu ne'ebé involve iha prosesu ne'e ho seriu tuir natureza no gravidade husi krime ne'e”, dehan Diretor JSMP, Luis de Oliveira Sampaio.

JSMP preukupa teb-tebes tanba kazu krime kontra umanidade ho natureza no ambitu krime ne'ebé diferente tebes ho krime ordinariu sira, maibe prosesu ba kazu kontra umanidade kuaze hanesan ho krime ordinariu sira.” Pior liu mak, iha dia tinan 2011, Tribunal Distrital Dili kondena tina ona arguidu Valente Lavio ne'ebé involve iha krime kontra umanidade iha Distritu Liquiça, maibe kondenuadu oras ne'e lao livre no goja hela nia impunidade iha Indonezia, tanba nia halai sai durante prosesu rekursu sei lao hela. Too agora la iha esforsu no komitementu husi orgaun kompetente sira henesan Ministeriu Públiku no instituisaun relevante sira atu lori fila kondenuadu mai reponsabiliza no kumpri desizaun tribunál nian.

Atu antisipa situasaun hanesan akontese ba kazu ne'e, JSMP husu atu tribunal aplika media koasaun ruma ne'ebé apropiadu ba kazu ne'e durante prosesu julgamentu seidakonklui.

Iha akuzasaun Ministériu Públiku nian ne'ebé lee atraves husi tribunál, haktuir katak iha 4 Setembru 1999, arguidu hamutuk ho membru Milisia Besi Merah Putih (BMP) sira seluk ne'ebé hetan suporta husi *Tentara Nasional Indonesia* (TNI) no *Polisi Indonesia* (POLRI) baku, tuku, tebe, no tiru mate vítima Jacarias Alves, Duarte do Santos, Augusto, Markus, Jaime Soares, Domingos no Leopoldo iha Distritu Liquiça.

Tuir lolos arguidu sira ne'ebé alegadu involve iha kazu ne'e hamutuk ema na'in 58, maibe tribunál julga deit arguidu LV tanba arguidu sira seluk too ohin loron seidakonklui fila mai Timor Leste no sei hela iha Indonezia no arguidu sira balu mate ona. Relasiona ho kazu ne'e, Ministériu Públiku no Defeza apresenta lista testemuña hamutuk ema na'in 132.

Prosesu julgamentu ne'e prezide ho kompozisaun Juís Koletivu ne'ebé xefia husi Dr. Julio Gantes, hamutuk ho Dr. Pedro Reposo de Fiqueredo no Dra. Jumiat Freitas hanesan membru koletivu. Ministériu Públiku representa husi Dr. Luis Landim no Defeza representa husi Dr. Manuel Exposto husi Defensoria Públiku.

Julgamentu sei kontinua fali iha 10 Fevereiru 2014, iha tuku 09:00 dader ho agenda rona deklarasaun arguidu no depoimentu husi testemuña sira.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl